

Gazeti Lmsscc no 4/2017.

## NTUMA Nyagasani no 4



**AKANYAMAKURU K'ABALAYIKI MISIYONERI B'UMUTIMA MUTAGATIFU WA YEZU  
NA MARIYA MU RWANDA**

**IBIRIMO.**

**I.IJAMBO RY'IBANZE.**

**II.ISANO IRUTA IY'AMARASO "GUSANGIRA UBUZIMA  
N'UBUTUMWA.**

**III.AHARI URUKUNDO N'UMUBANO IMANA IBA IHARI.**

**IV.IMYAKA 50 ABAMISIYONERI B'UMUTIMA MUTAGATIFU  
WA YEZU NA MARIYA BAKORERA MU RWANDA.**

**V.YUBILE Y'IMYAKA 50 Y'ABAMISIYONERI B'UMUTIMA  
MUTAGATIFU WA YEZU NA MARIYA IDUSIGIYE IKI?**

**VI.BAMWE MU BALAYIKI MSSC BITABYE IMANA TWIBUKA .**

**VII.PARUWASI KIZIGURO MSSCC BITABYE IMANA TWIBUKA .**

**VIII.UTUNDI N'UTUNDI.**

**IX.JEUNES LAIQUES MISSIONNAIRES DE JESUS ET DE MARIE  
ZONE BUTARE.**

## **IIJAMBO RY'IBANZE.**

Mu mwaka wa 2017, twibutse imyaka 50 abamisiyoneri bamaze mu Rwanda,twishimira byinshi byakozwe,ariko kandi twanahungabanyijwe n'abanyamuryango benshi bitabye Imana kandi mu gihe gito.

- Yaratabarutse umuvandimwe wa Padiri Tuyisenge Dominique.
- Yaratabarutse umulayiki msscc Mukandori Belencile,akurikira umubyeyi we ndetse n'umugabo we Bwanakweri Michel .

-Aratabaruka umubyeyi wa Rudasingwa Venuste nyuma y'amezi 5 ari muri Coma.

-Atabaruka akiri muto Padiri Innocent Kubwimana.

-Arigendera Madamu Rutagarama Aloys akaba na muramu wa Padiri Rutinduka Laurent.

N'abandi benshi b'inshuti z'abalayiki msscc

Nibyo koko ,twaremwe n'Imana kandi turemerwa yo.

Nyamara ,kubera umubiri twambaye, kwakira ko abacu batuvuyemo buri gihe ntabwo bitworohera.

Abo bavandimwe , ababyeyi,inshuti,abana bitabye Imana mu gihe gishize ,Imana ibakire cyangwa yarabakiriye,Gusa, bateye icyuho, ndetse bigira ingaruka no kuri aka kanyamakuru NTUMA NO 4, imwe mu mpamvu zartumye gatinda gusohoka.

Mubyihanganire.

Venuste.

## **II.ISANO IRUTA IY 'AMARASO "GUSANGIRA UBUZIMA N'UBUTUMWA ".**

### ***Tugaragaza dute iyo sano ?***

Ubuzima tuvuga hano ni ukumenya Imana mu butatu butagatifu n'umubyeyi Bikira Mariya ". Ubwo bumenyi tubukura muri Kiliziya niyo mpamvu ntawaba LMSSCC hanze ya kiliziya . Ku bw'ibyanditswe bitagatifu no ku bw'Ingabire y'Imana , twamenye byinshi ku Mana:

Muri kamere yayo, Imana ni Urukundo (1Yohani 4, 8). Koko rero Imana ntiyahwemye guhishurira umuntu urukundo ruhebuje imukunda. Haba ku muntu ku giti cye , haba no ku muryango wayo muri rusange. Ku buryo bw'ikirenga urukundo Imana idukunda turubona mu kwigira umuntu kwa Jambo, mu urupfu n'izuka bye.

LMSSCC dusangira ubwo buzima igihe duhugurirwa hamwe , dufatanya kwishimira no kubaho muri urwo rukundo nkuko Yezu Kristu Umwami wacu abidutegeka (Yh.15, 12) LMSSCC agomba kumenya abandi bafatanyije urugendo rwo kwitagatifuza mu muryango w'Abamisiyoneri b'Umutima Mutagatifu wa Yezu n'uwa Mariya. Ngicyo ikidutera gusurana no gufatanya mu byiza no mu bibi, mu bibazo no mu bisubizo. Buri wese kandi agira igikorwa iyemeza gukora mu buzima bwe mu rwego rwo kwamamaza urukundo rwuje impuhwe Imana ikunda buri muntu.

Ubuzima bw' umukirisitu ni urugamba rwo guhitamo hagati y'icyiza n\ikibi . Akensi ugasanga icyo twahisemo gukora ntitukemeranywaho n'umutimanama wacu kuko aka Pawulo Mutagatifu ,dushaka gukora icyiza, ikibi tudashaka kikadutanga imbere. Kubera iyo mpamvu bavandimwe muri iyi numero , dusenze ari ngombwa kubagezaho amasezerano buri LMSSCC yagize mu Muryango ngo turusheho gushygikirana ku rugamba rwo kuzuza inshingano twiyemeje.

### **III. AHARI URUKUNDO N'UMUBABO IMANA IBA IHARI.**

Dore urutonde rwa bamwe mu ba LMSSCC n'amasezerano yabo



IZINA:  
BAZIHIZINA Consilee  
UBUTUMWA:  
KWITA KU BARWAYI



IZINA:  
GASASIRA Felicien  
UBUTUMWA:  
ABASAZA  
N'ABAKECURU



IZINA:  
INGABIRE Honorine  
UBUTUMWA:  
ABARWAYIN'ISENGESHO



IZINA:  
MUKABARANGA Helena  
UBUTUMWA:  
KWITA KU BATISHOBOYLE



IZINA:  
MUKABARISA Petronille  
UBUTUMWA:  
GUSURA ABARWAYI



IZINA:  
MUKAGASANA Anne  
Marie  
UBUTUMWA:  
ABARWAYI



IZINA:  
MUKAMPUNGA  
Francoise  
UBUTUMWA:  
ISUKU NA LITURJIYA



IZINA:  
MUKAMURETA Therese  
UBUTUMWA: INGO  
N'ABITEGURA  
KURUSHINGA



IZINA:  
MUKANDAHIRO MARIE  
UBUTUMWA:  
GUTEGA AMATWI  
IMBABARE



IZINA:  
MUKANDANGA  
SPECIOSE  
UBUTUMWA:  
ABASHONJI  
N'ABAMBAYE UBUSA



IZINA:  
MUKARUGIRA  
EUGENIE  
UBUTUMWA:  
MFUBYI



IZINA:  
MUKASEKURU Therese  
UBUTUMWA:  
KWITA KU  
BATISHOBOYE

Ubutumwa dufite kandi dusangiye, ni ubwo "kwamamaza" urukundo rw'Imana mu bantu cyane cyane abatabasha kurubona bitewe n'ibibazo by'ubuzima barimo (abarwayi , abatishoboye, abihebye,...) abo nibo tubona ko bahinguranyijwe n'isi aka Yezu wahinguranyijwe icumu kubera kudushakira umukiro, twebwe abanyabyaha.

Ibikorwa bya LMSSCC kandi byuzuzanya n'ibya MSSCC ni ukuvuga abanyamuryango bari mu nzego z'Abihayimana. Ibyo bituma LMSSCC bitabira imirimo ya Litulijiya nko gusoma Ijambo ry'Imana ,kugabura isakaramentu ritagatifu, kwita ku bwiza bw'ingoro y'Imana n'ahandi abakirisitu bateranira basingiza Imana , gufasha abitegura guhabwa amasakaramentu,... bigatuma inshingano ya MSSCC yo kogeza inkuru nziza mu bantu igerwaho neza kandi batavunitse.

Bavandimwe dukunda ngo" abishyize hamwe ntakibananira". Nitwunga ubumwe mu isengesho no mubikorwa nkuko Imitima Mitagatifu uwa Yezu n'uwa Mariya twisunze yunze ubumwe, icyo tuzasaba Data tuzakibona nta gushidikanya. Yezu ubwe yarabidusezeranyije kandi tuzi ko atajya yica isezerano (Mt.18,19 ).

UBWANDITSI.

#### **IV. IMYAKA 50 ABAMISYEZU NA MARIYA BAKORERA MU RWANDA !**

Muri numero iheruka twabagejejeho uko kwizihiza Yubile y'ivo myaka byatangijwe. Ikaba yaratangiriye muri paruwasi ya KIZIGURO . Ibirori by'uwo muhango byaranzwe n'igitambo cya misa , amasezerano ya LMSSCC n'ubusabane hagati ya MSSCC bose n'inshuti zabo . Muri ino numero rero tugiye kubagezaho muri make uko ibikorwa byo kwizihiza iyo Yubile byakomeje.

Muri uno mwaka wa Yubire, habayeho kuzirikana ku bikorwa by'Abamisiyoneri ba mbere. Muri urwo rwego, hasuwe amaparuwasi bahereyemo ariyo Rwamagana na Rukara zo muri diyoseze ya Kibungo.

Nkuko intumwa zoherejweyo zibivuga ngo bakiriwe neza bishimira kumva ayo mateka y'Abamisiyoneri MSSCC . Nk'i Rwamagana , abakiristu bahuriye muri santarari ya Ruhunda maze mu gitambo cya misa bishimira kugezwaho ubutumwa Padiri uhagarariye Umuryango w'Abamisiyoneri b'Umutima Mutagatifu wa Yezu na Mariya , Edouard Twizeyimana aherekijwe na Padiri Yves ...yari yabageneye. Mu ijambo rye Padiri yabashimiye uburyo paruwasi yabo yemeye kwakira abo bamisiyoneri ba mbere, bakababanira neza dore ko byari bigoye kuko batari bazi ikinyarwanda. Yanababwiye imikorere ya MSSCC bakomora ku uwashinze Umuryango Jaohacquin Roseillo, ababwira n'ibyiciro bigize MSSCC n'inshingano ya buri cyiciro. Yaboneyeho abereka abo bazanye : abahagarariye LMSSCC aribo Madamu Françoise Mukampunga na Bwana Gamaliel Segicondo hamwe n' umukozi wa Concordia Ineza Madamu Rose Kelly Uwizeyimana maze na bo mu kwibwira abakiristu babagezaho uruhare rwabo mu butumwa bwa MSSCC. Hari ku itariki ya 12 Kamena 2017. Muri paruwasi ya Rukara hagiyeo padiri Edouard uhagarariye Umuryango wa MSSCC mu Rwanda aherekejwe na Madamu Therese Mukasekuru, LMSSCC akaba n'umukorerabushake muri Fondation Concordia-Ineza. Naho ngo bakiriwe neza kandi batega amatwi ubutumwa bari babashyiriye barabwishimira.

Yubile yashorejwe i Butare mu rugo rwa MSSCC ku itariki 19 Kanama 2017.Uwo muhango wahujwe n'amasezerano ya y'Abanovice ndetse na LMSSCC.

Mu ijambo rye, Umukuru w'umuryango w'Abamisiyoneri b'Umutima Mutagatifu wa Yezu na Mariya yagarutse ku bikorwa byaranze abapadiri b'Abamisiyoneri b'Umutima Mutagatifu wa Yezu na Mariya ariyo kogeza ivanjiri no gukora ibikorwa byo mu buzima busanzwe bw'imibereho y'abantu (vie sociale) mu gufasha abatishoboye binyuze muri Fondation Concordia Ineza.

Yavuze rero ko bafite byinshi byo gushimira Imana muri uwo muhango wo kwizihiza Yubile. Yagaragaje kandi ko yishimira ko Abalayiki Misyoneri bagenda baba benshi kuko no mu Rwanda bakomeje kuvuka bakaba basangiyе Umuhamagaro ( charisme ) n' ubuzima bwa roho ( spiritualité ) n' abihayimana b'abamisiyoneri . Yaboneyeho agaruka ku buzima bwa roho bw'Amisiyoneri ( MSSCC) ushingiyе ku Mutima Mutagatifу wa Yezu na Mariya no ku rukundo rw'Imana n' umuhamagaro wabo wo kurangamira Imana (contemplation), kubana kivandimwe ( communauté de fraterinité) n' ubutumwa ( la mission). Ngo mu myaka bamaze muri Afrika bamenye icyo aricyo kubaho mu mu hamagaro w'Abamisiyoneri muri Afrika ku buryo yibajije icyo Umuryango ( Congrégation) wacu wari kuba aricyo ubu, iyo baba bataraje muri Afrika kuko ngo ubu bafite abapadiri benshi kandi bato bahakomoka.Yashimiye Musenyeri kuba yari yitabiriye ibirori anibutsa ko uwashinze Umuryango wacu yifuje ko Umuryango ugomba kuba hafi ya Kiliziya ( Eglise locale) nkuko ikimera cya Liyere ( Lierre) kiba cyizingurije ku kintu kigikikije.

Ibirori byasusurukijwe n'ibihangano bitandukanye by'abari mu matsinda akorana na Fondation Concordia Ineza akorera i Butare. Bisozwa n'ubusabane hagati y'Abamisiyoneri b'Umutima Mutagatifу wa Yezu na Mariya n'abashyitsi benshi bari bitabiriye ibirori.

#### **V. YUBILE Y'IMYAKA 50 Y'ABAMISIYONERI B'UMUTIMA MUTAGATIFU WA YEZU NA MARIYA IDUSIGIYE IKI?**

Imyaka 50 irashize abamisiyoneri b'umutima mutagatifу wa Yezu na Mariya bageze mu Rwanda.

Ni Yubile y'ibyiza byinshi ariko kandi mu byiza ntihaburamo n'ingorane.

1.Inkuru nziza yamamajwe mu banyarwanda.Ni inkuru nziza y'urukundo ruturuka kuri Yezu Kristu ubwe, n' amahame y'umuryango wa msscc.

Abanyarwanda bahawe amasakaramentu(kubatizwa,ukarisitiya,gukomezwa, imbabazi muri penetensiya,gushyingirwa gikirisitu, ubusaseredoti, ugsigwa kw' abarwayi).

Buhoro buhoro kuri benshi, Ukwemera kwagiye kwigaragaza ,umuntu cyane cyane utishoboye agira agaciro,ukuri gusimbura ikinyoma,kwihangana no kwiyoroshy,a gusaba imbabazi no kubabarira biranga benshi mu bakirisitu,gutabara abarwayi n' abandi bafite ingorane birakorwa.

Abanyarwanda bigishijwe byimbitse ijambo ry' Imana.

Imiryango y' agisiyo gatolika na za Komisiyo zitandukanye biravuka, byose bigamije kwigisha abantu kugira uburere mboneramana,uburere mbonerabupfura, uburere mboneramubano,... bikomeza gufata umwanya mu mibereho ya muntu.

2.Abamisiyoneri msscc bagize kandi uruhare mu rindi iterambere rya muntu :

- Bigishije abantu gusoma no kwandika .
- Bubakishije amashuri y' abana ahantu hatandukanye.
- Bashyizeho amashuri y' imyuga afasha urubyiruko.
- Batoje abantu kugira isuku ku mubiri,ku myambaro, mu ngo, aho abantu benshi bahurira....
- Bubatse ibitaro bya Kiziguro.
- Bubatse amazu y' abatishoboye benshi i Kiziguro,Nyakayaga na Butare.
- Bubakiye abatishoboye ibegege by'amazi.
- Bafashije abantu cyane cyane abakene korora amatungo magufi(Ihene,inkoko,inkwawu,ingurube,)
- Batangiriye abanyeshuri batishoye amafaranga y'ishuri(cyane cyane mu mashuri yisumbuye).
- Abana b''abakene,biga mu mashuri abanza benshi bahawe imyambaro y'ishuri,inkweto,amakayi,amakaramu,amasabune,ibikapa, kugirango bashobore kwigana neza n'abandi baturuka mu miryango yishoboye.
- Batoje abantu guhinga neza ibihingwa bitandukanye birimo imboga n'imbuto, bityo batangira no kwigishwa gufata indyo nziza kandi yuzuye .
- Batoje abantu kwihunikira imyaka (ibigori,bishyimbo,amasaka) kugirango bateganyirize ibihe bibi.
- Bahaye abakene ubwishingizi mu kwivuza no mu myigire(mutuelle de santé, assurance education)abandi bakigishwa uko babyishakira.

### Inzitizi

- Imyumvire** yari hasi cyane ariko buhoro buhoro igenda itera imbere.
- ururimi** : Abamisiyoneri babanje ntabwo bari bazi neza ikinyarwanda, gutanga ubutumwa bukumvikana ntabwo byari byoroshye.
- Umuco n' imyemerere:** Kwinjiza umuco w' ivanjiri mu muco wa Kinyarwanda , hari aho byagendaga bigorana. Abatari bake bari basazwe bafite imyemerere yabo,ishingiye ku idini gakondo yabo. Icyiza ni uko abanyarwanda bari basanzwe bazi Imana imwe,Rugira,Rugaba,ko kandi umuntu adapfa nk' imbwa n'imbeba, Kubihuza rero ,n' ubwo byabanje kugira inzitizi, buhoro buhoro

byagiye bigira aho bihurira ari nako bituma umunyarwanda yaguka mu myemerere ye.

**-Ibyago byinshi :**

+Intambara : yabaye mu 1973, iyabaye, 1990 kugeza 1994.

+Genocide : Guhera le 7/04/ 1994 , hatangiye genocide yakorewe abatutsi.

+Abapadiri bitabye Imana :

Padiri Karuranga Gerard

Padiri Jean Baptiste Nyandekwe.

-Padiri Guillaume Bauza.

-Padiri Kubwimana Innocent.

Uretse Padiri Guillaume, wari ufite imyaka irenze 60, abandi bose bose bitabye Imana batararenza imyaka 40.



Barunamira imva ya Nyakwigendera Padiri Karuranga Gerard, aho yashyinguwe muri Mutarama 1994. Ni muri Paruwasi ya Rukara.

Hari kandi n'ababayiki msscc bitabye Imana :

-Mvumba André wo muri centrale ya Nyabisindu.

-Batamuriza Béatrice bitaga Gicali wo muri Centrale ya Rwimitereri.

-Bwanakweri Michel wo muri centrali ya Kiziguro.

-Mukandori Belencille wo muri centrali ya Kiziguro.

-Nikuze Claudine w'i Butare.

-Mukabuduwe Didacienne wo muri Centrale ya Kiziguro.

Izo nzitizi zateye ingaruka ku butumwa bw'abamisiyoneri msscc :

+Abitabye Imana bagiye basiga icyaho mu miryango baturukamo no muri za gahunda zo mu butumwa.

+ Ihungabana ry'abakiristu batari bake kubera genocide n' ingaruka mbi zayo

+Amakimbirane mu miryango y'abanyarwanda n'abakirisitu by 'umwihariko/

N'ubwo habayeho inzitizi, ubutumwa buracyakomeje.

Nta bwoba rero, dore ko uwacunguye isi, nawe yanyuze mu ngorane zitoroshye, kugeza ku rupfu, ariko akarutsinda.

Ni dugukomere rero mu kwemera.

Bumwe mu butumwa Bikira mariya yavugyiye i Kibeho bwadufasha ni :

**-Kuzirikana buri gihe kwisubiraho.**

**-Gusenga nta buryarya kandi nta kurambirwa.**

**-Kuzirikana agaciro k' ububabare mu mibereho ya Gikirisitu.**

## **VII. BAMWE MU BALAYIKI MSSCC BITABYE IMANA TWIBUKA.**

*Mvumba André: 1948 ----9/11/2003. Umwe mu balayiki msscc babayeho b'intangarugero.*



Hari ku masaha y' igicamunsi cyo mu mwaka wa 1948, I Gashya mu mudugudu w'Akantunga, akagari ka Nyabisindu, umurenge wa Kiramuruzi, Akarere ka Gatsibo, Intara y' I burasirazuba, ubwo Munyanzeza Etienne, yari ahangayitse kubera ko umugore we Nyirababirigi yari ku bise, bategereje ko ari bubyare umwana. Muri icyo gihe, ivuriro rya hafi ryari I Gahini. Benshi mu bagore babyariraga mu ngo. Kubyarira kwa muganga byabaga iyo umugore yabaga yagize ikibazo kidasanzwe. Abagore babatwaraga mu ngobyi ya Rusuri. Imodoka na moto byari bkeya cyane bigaharirwa abifite.

Mu rugo rw' abaturanyi bari bahishije amarwa, kandi inyota igakomeza kuzengereza Munyanzeza Etienne. Mu muco wa Kinyarwanda kujya gusaba inzoga ku muntu wayihishije n' ubwo ntacyo wabaga wamukoreye byari umuco. Nibyo bitaga Kuvumba.

Munyanzeza yaje kunyaruka ajya gusaba muri rwo rugo akayoga, baramuha, asangira n' abandi banaganira nk' uko icyo gihe byari umuco, aritonda, arasoma, aracurura, inyota irashira.

Ariko aza gukoma agatima ko yasize umugore we atameze neza, agaruka bwangu, ageze iwe, asanga umufasha we yabyaye umwana w'umuhungu, kandi yamubyaye neza.

Ni uko mu kwirahira kwe, mu byishimo ariko nanone asa naho ababajwe n'uko umusherি we yabyaye adahari ,ati: ivumba ryanje rizankorera ishyano! Mvumba ,mvumba, ubu nabigabanyije koko! Nguko uko izina rya Mvumba rifata umwana gutyo. Nyuma Mvumba yaje kuba umugabo mwiza, benshi bagiye bafatiraho urugero rw' ubuhanga n'imico myiza.

Mvumba André akaba rero yarakuriye aho ngaho I Gashya, yiga amashuri abanza ku kigo cya Nyabisindu, ayasoreza ku kigo cy' amashuri cya Kiziguro.

Amashuri yisumbuye yayize i

Zaza, mu ishuri nderabarezi ry' icyo gihe.

Amaze kurangiza yabaye umurezi ku kigo cya Nyabisindu, nyuma bamwimirira I Rwimitereri.

Guhera mu mwaka wa 1974, amaze gushakana na Mukamusoni Catherine, yakoze umurimo w'ubucamanza kugeza muri Mata 1994, ubwo habaga genocide yakorewe abatutsi.

Aho genocide ihagarikiwe, kuva mu kwezi kwa Nyakanga 1994 kugeza mu mwaka wa 1995, yabaye umwungiriza wa Bourgmestre w' icyahoze ari Komini Murambi.

Guhera mu mwaka wa 1996, yasubiye mu mirimo ye y' ubutabera kugeza ubwo yitabye Imana le 9/11/2003.

Mu mwaka wa 1998, Padiri Rutinduka Laurent, msscc, yatangije itsinda rya mbere ry' abalayiki msscc, harimo na Mvumba André.

Mu nama , amahugurwa, imyihherero, yatangaga ibitekerezo byiza byubaka, abamwumva bakamutega amatwi bitonze kubera imvugo nziza y' ubuhanga yagiraga.

Mu muryango wa lmsscc, yahuguye bagenzi be kuri Gacaca nkirisitu, hagendewe ku mateka mabi bari bavuyemo,

Ibyiza byo gusurana hagati ya lmsscc, .... yagiriye benshi inama zo kwiyubaka.

Yabashije kwihangana, abagizi ba nabi bamuteye urusasu rwa grenade iwe mu nzu, rukomeretsa bikomeye umufasha we Mukamusoni Catherine, ku buryo yakurijemo ubumuga bwa burundi.

Mvumba André yafashwe n' indwara ya simusiga , yivuriza ahashoboka hose, ariko, biranga aza kwitaba Imana le 9/11/2003, asiga umugore, abana 6, barimo abahungu 3 n' abakobwa 3.

Yari umugabo usabana cyane n' abantu bose, ususurutsa ibirori, igitaramo, iyo yabaga yahawe iyo mirimo, usura abantu, ucisha make, abantu bose bakamwibonamo, n'ubwo mu gihagararo, wabonaga ko yagira igitinyiro.

Tuzakomeza kumwibuka , nawe aho ari ajye adusabira aho yibereye.

Ibyo tumwibukiraho ni:

*Kwita ku murimo ushinzwe.*

*Gusabana n' abantu bose.*

*Kwiha agaciro no kugaha abandi.*

*Kujya inama.*

*Kugira ukuri mu mivugire no mu mikorere.*

*Gutabara abababaye.*

*Kurangwa n' akanyamuneza.*

*Kwhanganira ingorane.*

Venuste.

## VII. PARUWASI KIZIGURO YIBARUTSE UNDI MUPADIRI



**Padiri Nizeyimana Jean de Dieu ,uvuka Gitaburaza , muri Santarari ya Kimironko.**

Ni ku itariki ya 22 Nyakanga 2017 aho Diyakoni Jean de Dieu Nzeylimana yashyizwe mu rwego rw'abasaserodoti i Kabgayi hamwe n'abandi bagenzi be bagera kuri 62. Uwo muhango ukaba warabaye mu gitambo cya misa cyo kwizihiza Yubile y 'imyaka 100 ishize Abanyarwanda ba mbere : Balthazar GAFUKU w'I Zaza na Donat REBERAHO w' i Save bahawe isakaramentu ry'ubusaserodoti .

Byabaye ibyishimo byinshi kongera kubona umupadiri ukomoka muri paruwasi. Ibyo byishimo abakirisitu ba paruwasi Kiziguro babigaragaje by'umwihariko mu birori byo kwakira Misa y'Umuganura Padiri Jean de Dieu NZEYIMANA yaturiye muri Sukirisare avukamo ya Bugarura. Kuri uwo munsi kandi Sukirisare ya Bugarura yahawe uburenganzira bw'agateganyo na Padiri Mukuru wa Paruwasi Kiziguro Laurent RUTINDUKA bwo gukora nka Santarari KIMIRONKO.

Uburenganzira bwa burundi ikazabuhabwa n'Umushumba wa diyoseze ya Byumba ari na we uzayiha umugisha mu minsi iri imbere. Ibirori byaranzwe n'igitambo cya misa cyatuwe na padiri mushya akikijwe n'abapadiri bakorera ubutumwa muri paruwasi Kiziguro , abakorera ubutumwa ahandi bavuka muri Kiziguro ,abapadiri b'inshuti za paruwasi , abandi bihayimana n'imbaga y'abakiritu baturutse imitaga yose.



Nyuma y'igitambo cya misa, ibirori byasusurukijwe n'ibihangano bitandukanye :imbyino, indirimbo,

imivugo,... byerekanywe n'abakiristu ba buri Muryangoremezo wa sukirisare ya Bugarura . Ari ibihangano ari n'amagambo yahavugiwe ,byose byagarukaga ku kubwira padiri mushya ko bamwishimiye kandi ko bamwifurije ubutumwa bwiza , ibyo bigaherekezwa n'impano bari bamugeneye



Ibirori byari bishyushye nyuma ya misa y' umuganura muri santarari ya Kimironko.

Mu ijambo rye, padiri mushya Jean de Dieu Nzeyimana yavuze yishimiye ingabire y'ubusaserodoti yahawe. Ahereye ku babyeyi

bamwibarutse, yashimiye abamufashije bose haba mu mikurire ye ku mubiri no kuri roho ndetse no mu myigire ye. Yashimiye kandi paruwasi ya Kiziguro yamushyigikiye mu kwizihiza isakaramentu ry'ubusaserodoti . Abo bose Padiri Jean de Dieu Nzeyimana yabasezeranyije kujya abasabira. Yashoje ijambo rye

amenyesha abari aho paruwasi yoherejwemo gukoreramo ubutumwa ariyo  
Bungwe.

Ibirori byashojwe n'ubusabane bwabereye muri salle nshya ya santarari Kimironko  
ahagana mu ma saa kumi z'umugoroba.

Spéciose NYIRABASHUMBA.

## **VIII. UTUNTU N'UTUNDI.**

### **Byenda gusetsa.**

1.Umunsi umwe Nyirubutungane Papa yagiye gusura no gusabira abimukira bari mu gahinda batewe n''intambara z'urudaca bari bamazemo igihe.

Kubera ko yabonaga umushoferi we asa naho ananiwe cyangwa arwaye, amusaba kuba amwakiriye , bityo aba ariwe witwarira imodoka.Naho umushoferi aba aruhutse gato yicara mu mwanya w' inyuma bakunda kwita umwanya w'icyubahiro(place d' honneur).

Bitewe n'umuhangayiko wo gutabara vuba iyo mbaga y' Imana ibabaye, Papa yagerageje kwihuta ngo agereyo vuba ariko police iramuhagarika dore ko yari yarengeje gato umuvuduko wemewe muri uwo muhanda.

Abapolice babonye ari Nyirubutungane witwaye, baratangara cyane, ariko baramuhagarika .Batefona umushefu wabo ko bahagaritse umuntu ukomeye cyane. Shefu agenda ababaza uwo muntu ukomeye uwo ariwe kugera no kuri Perezida abandi bakamuhakanira. Ni uko bagezaho bamubwira ko uwo muntu ukomeye ari Nyirubutungane Papa, ko kandi inyuma ye mu mwanya w'icyubahiro hicayemo undi ushobora kuba ari MWANA Papa atwaye!!!

Venuste

2. Kera habayeho inzara ndende, abagabo 2 bajya inama yo kujya guhaha mu mahanga. Inzira bagombaga kunyuramo yacaga mu ishyamba ribi,ribamo inyamaswa z'inkazi zirya abantu, cyane cyane intare.

Umwe agira inama mugenzi we ati : Niduhura n'intare ,ntuhunge, tuyirwanye dushyize hamwe, nibwo turi buyishobore.

Bafashe inzira baragiye , no mu ishyamba. Barigezemo hagati, intare iba ishinze amajanja imbere yabo, n' umutontomo mwinshi.

Wawundi wari watanze inama,yari hafi y' igit i aracyurira,aba ageze mu bushorishori bwacyo aho intare itamushykira.

Mugenzi we, agira uwomba bwinshi,abonye ko atari bushobore iyo ntare wenylene, agwa igihumure, yikubita hasi ,asa n' uwapfuye.

Intare iramwegera, iramuhunahuna,kuva ku mutwe kugera ku birenge, ibigira nka gatatu imuguma iruhande akanya karinganiye,ibonye ko

atanyeganyega,irannyogagira irigendera.Ubusanzwe intare ntabwo ipfa kurya inyamaswa yipfushije keretse iyo yashonje cyane.

Hashize umwanya intare yagiye, mugenzi we wari mu giti, aramanuka, akangura mugenzi we, arahumuriza amumenyesha ko intare yagiye.

Ni uko undi amaze guhembuka, arahaguruka bakomeza urugendo.

Bamaze gushararuka, uwari mu giti abaza mugenzi we ati : « Ko nabonye intare ikongorera , yakubwiraga iki ?

Undi arasubiza ati : Yambwiraga ngo sinzate mu nama umuvandimwe wanjye nk ‘ uko iriya ndyarya iri mu giti yabikoze.

Venuste.

3.Umugabo wari umaze igihe kinini atabona ku kaboga(akanyama) kandi agakunda cyane, yagiye ku muganda aca ku bantu barimo kubaga ihene.

Nuko ariyamirira ati : « vraiment donc ! Murabaga umuganda ku munsi w’ihene ?

Baramuseka ! Arakomeza , abonye indi hene iziritse ku nzira , ati « Iriya baga nayo muyihebebe, noneho si ukumuseka induru bayiha umunwa !!!!Consolée.

4.Ibisambo byagiye kwiba umukecuru byakekaga ko afite amafaranga n’ ibintu byinshi. Ndetse bijya inama mbi yo gusiga banamwishe. Byaje rero gucunga , arangaye, byinjira mu nzu atabizi, byihisha munsi y’igitanda cye.Umukecuru agiye kuryama, arabanza arasenga mu ijwi riranguruye.

Mu isengesho rye aza no gusabira abajura, asaba Imana kubafasha kureka ingeso yo kwiba, ariko n’ abo byananiye bakajya kwiba , Imana ibafashe ntibafatwe, kubera ko bashobora kuhatakariza ubuzima.

Ibisambo byari beteze amatwi, bibyumvishije, biratangara byibaza biti : Ese burya natwe tugira abatugirira impuhwe? Biva aho byari byihishe, biba bigeze hejuru ye,n’ inkota.Umukecuru arikanga, ariko biramuhumuriza, bimubwira ko ntacyo bimutwara, ko byari bije kumwiba, bikanamwica, ariko kubera ko yabizirikanye mu isengesho, Ko imbabazi yabigiriye nabyo bizimuhaye.

Bimusezeranya kandi ko isengeshho rye ryabakoze ku mutima, bityo bakaba batazongera kwiba ukundi,

Umukecuru abahera ku buntu bimwe mu byo bifuzaga kwiba, barikubura barataha.

Bernadette.

1.Umwana wari ugejeje imyaka yo gutangira umwaka wa mbere yumvise aho baganira bavuga papa we, yumva bavuga ngo afata rimwe akandika umunani(bashaka kuvuga kuvuga ko asinda vuba).

Umwana ageze mu ishuri bamwigisha kubara. Ariko yatangira kubara rimwe n' umunani akabisimbuka. Mwarimu amubajije impamvu atavuga iyo mibare asubiza ko ari iya papa we , kubera ko afata rimwe akandika 8.

Kubera iki ?

Ufata umubare wakongeraho uwo bisa , ugakuba na 3,igisubio ubonye wakigabanya na wa mubare wa mbere ukabona buri gihe 6 ?Consolée.

## **IX.JEUNES LAIQUES MISSIONNAIRES DE JESUS ET DE MARIE ZONE BUTARE**



### **TURAFASHA KUBWUMUTIMA MUTAGATIFU WA YEZU NA MARIYA**

**Kwiyegurira umutima wa Yezu ni ukugira umutima mushya ukunda.**

*Abarayiki b'urubyiruko b'Umutima Mutagatifu wa Yezu na Mariya (JLMSSCC) zone ya Butare muri rusange dukora amahuriro adufasha gusenga no kumenya umuryango, ibikorwa by'impuhwe nk'uko devise yacu ibitubwira « pour l'amour aux sacrés coeurs nous servons ».*

Dukora ihuriro rimwe (1) mu kwezi ku cyumweru cya mbere cy'ukwezi. Mu mwiherero tugira tunganirizwa

n'abapadiri bityo tukarushaho gusangizwa ku mateka y'umuryango. Mu rwego rwo kurushaho guhura no kumenyana duhurira hamwe tugashengerera Yezu mu isakamentu ritagatifu ry'Ukaristiya, twese rimwe mu cyumweru aba jeunes, abalayiki bakuru n'abihaye Imana bityo tukarushaho kwegerana na Yezu.

Urukundo nibyiza ko ruva mu magambo rukajya mubikorwa, nimurwo rwego tugira igikorwa cyogufasha abababaye kiba kabiri mu mwaka. Mu gihe cya Adiventi no mu gihe cy'igisibo. Muri uyu mwaka wa 2017 dufatanije n'abalayiki bakuru twasuye abagororwa kuri gereza ya Karubanda. Tubaha imyambaro, ifu y'igikoma, isukari, amavuta yo kwisiga, n'isabune. Igikorwa cyarebagwa abagororwa 20 batoranijwe hakurikijwe abatagira ubageraho. Muri iki gikorwa kandi twarikumwe na Padiri Jules Omonier w'abalayi b'abamisiyoneri b'Umutima Mutagatifu wa Yezu n'Uwamariya- Zone yabutare. *Abalayiki b'urubyiruko b'Umutima Mutagatifu wa Yezu na Mariya (JLMSSCC) tuvoma imbaraga*

*mumutima Mutagatifu wa Yezu, izo mbaraga ziduha umuhamagaro wokuba abalayiki « Sacri crodienne » b'impurirane z'Umutimama Mutagatifu wa Yezu na Mariya. Babihabwa n'uwashinze umuryango Joachim Rosello I Ferra. « pour l'amour aux sacrés coeurs nous servons » !*

